

## **ВОСКРЕСНА СЛУЖБА 5 ГЛАСА В СУББОТУ НА ВЕЛИЦЕЙ ВЕЧЕРНИ.**

На Господи, возвах, поставим стихов 10, и поем стихиры воскресны осмогласника, 3: и Анатолиевы, 4: и минеи 3, или 4, или 6, аще празднуется святой. Слава, минеи, и ныне, Богородичен гласа.

Стихиры воскресны, глас 5:

**Стих:** Изведи из темницы душу мою, \* исповедатися Имене Твоему.

**Честным** Твоим Крестом, Христе, \* диавола посрамил еси, \* и Воскресением Твоим жало греховное притушил еси, \* и спасл еси ны от врат смертных: \* славим Тя, Единородне.

**Стих:** Мене ждут праведницы, \* дондеже воздаси мне.

**Воскресение** дай роду человеческому, \* яко овча на заколение ведеса, \* устрашишася сего князи адстии, \* и взяшася врата плачевная. \* Вниде бо Царь славы Христос, \* глаголя сущым во узах, изыдите: \* и сущым во тьме, открийтеся.

**Стих:** Из глубины возвах к Тебе, \* Господи, Господи, услыши глас мой.

**Велие** чудо, невидимых Содетель, \* за человеколюбие плотию пострадав, \* воскрес Безсмертный, \* приидите отечествия язык, \* Тому поклонимся: \* благоутробием бо Его от прелести избавльшеся, \* в Трехипостасех \* Единого Бога пети навыхом.

Ины стихиры Анатолиевы, глас тойже.

**Стих:** Да будут уши Твои внимлюще \* гласу моления моего.

**Вечернее** поклонение приносим Тебе, \* Невечернему Свету, \* на конец веков, \* яко в зеркале плотию возсиявшему миру, \* и даже до ада низшедшему, \* и тамо сущую тьму разрушившему, \* и свет Воскресения языком показавшему: \* Светодавче Господи, слава Тебе.

**Стих:** Аще беззакония назриши, Господи, \* Господи, кто постоит; яко у Тебе очищение есть.

**Начальника** спасения нашего, \* Христа славословим: \* Тому бо из мертвых воскресу, \* мир от прелести спасен бысть. \* Радуется мир Ангельский, \* бегают демон прелесть, \* Адам падый воста, \* диавол упразднися.

**Стих:** Имене ради Твоего потерпех Тя, Господи, потерпе душа моя в слово Твое, \* упова душа моя на Господа.

**Иже** от кустодии научени бываху от беззаконников, \* покрыйте Христово Востание, \* и примите сребренники, \* и рцыте яко нам спящим, \* из гроба украден бысть Мертвый. \* Кто виде, кто слыша, мертвеца украдена когда, \* паче же помазана и нага, \* оставльша и во гробе погребальная Своя? \* Не прельщайтесь, иудее, \* навикните речем пророческим, \* и уразумейте, \* яко Той есть воистинну Избавитель мира, \* и Всесильный.

**Стих:** От стражи утренния до ноци, от стражи утренния, \* да уповает Израиль на Господа.

**Господи,** ад пленивый, \* и смерть поправый Спасе наш, \* просветивый мир Крестом честным, помилуй нас.

Ины стихиры, Богородице, Павла Аморрейскаго, глас 5.

Подобен: Радуйся:

**Стих:** Яко у Господа милость и многое у Него избавление, \* и Той избавит Израиля от всех беззаконий его.

**Престол** Херувимский воистинну, \* яко Превышши тварей бывши: \* в Тебе бо Божие Слово, \* наш зрак наздати хотя, \* вселися, и прошед с плотию из Тебе, Всечистая: \* Крестную же страсть нас ради восприял, \* и Воскресение яко Бог дарова \* измениемуся нашему осужденному естеству, \* тем, яко Содетелю, \* Сыну Твоему молимся, Богомати, \* уллучити прощение и милость в час судный.

**Стих:** Хвалите Господа, вси языцы, \* похвалите Его, вси людие.

**Что** Твою, Богородительнице Чистая, \* нареку Церковь Богославную? \* Вертоград Едемский именую, \* и Ноев, Чистая, ковчег прореку, \* спасший Богу царское священство, \* весь свят язык, \* Христа Бога нашего собор: \* Моисеову же кивоту уподобляю Тя, \* в немже очистилище и жезл прозябший, \* в немже свещник и ручка, \* кадилаица всезлатая, \* воньже прибегают всяк верный \* и испрошает велию милость.

**Стих:** Яко утвердися милость Его на нас, \* и истина Господня пребывает во век.

**Едина** безнадежных Надеждо, \* беспомощных готовая Помоще, \* милости Рождающая Волителя Иисуса, \* мою помилуй ныне немощь, Чистая, \* и подаждь ми помыслов умиление. \* Струями слез самых согрешений моих, \* непобедимую потопаи пучину: \* отжени безмерных моих страстей бурю: \* и исполни тишины Божественныя смущенное сердце мое, \* Христа молящи, \* подати ми согрешений совершенное оставление.

Таже минеи стихиры святому.

Слава святому, аще имать.

Аще ли ни, Слава, и ныне, Богородичен.

**В** Чермнем мори \* Неискусобрачныя Невесты образ написася иногда: \* тамо Моисей, разделитель воды: \* где же Гавриил, служитель чудесе. \* Тогда глубину шествова немокренно Израиль: \* ныне же Христа роди безсеменно Дева. \* Море по прошествии Израилеве пребысть непроходно: \* Непорочная по Рождестве Эммануилеве \* пребысть Нетленна. \* Сый, и прежде Сый, \* явлейся яко Человек, \* Боже помилуй нас.

Таже вход с кадилом. Свете Тихий:

Прокимен и ектении.обычаю.

На стиховне стихиры воскресны, глас 5.

**Тебе**, Воплощеннаго Спаса Христа, \* и Небес неразлучившася, \* во гласех пеней величаем: \* яко Крест и смерть приял еси за род наш, \* яко Человеколюбец Господь, \* испровергий ада врата, \* тридневно воскресл еси, \* спасая души наша.

**Стих:** Господь воцарися, \* в лепоту облечеса.

**Прободенным** Твоим ребром, Жизнодавче, \* токи оставления всем источил еси, \* жизни и спасения: \* плотию же смерть восприял еси, \* бессмертие нам даруя: \* вселив же ся во гроб нас свободил еси, \* совоскресив с Собою славно яко Бог. \* Сего ради воишем: \* Человеколюбче Господи, слава Тебе.

**Стих:** Ибо утверди вселенную, \* яже не подвижется.

**Странно** Твое распятие, \* и еже во ад сошествие человеколюбно есть: \* пленив бо его, и древняя юзники совоскресив \* с Собою славно яко Бог, \* рай отверз, воспряти сего сподобил еси. \* Темже и нам, славящия Твое тридневное Востание, \* даруй очищение грехов: \* рая жители сподобляя, \* яко Един Благоутробен.

**Стих:** Дому Твоему подобает святыня, \* Господи, в долготу дний.

**Нас** ради плотию страсть приемый, \* и тридневен из мертвых воскресый, \* плотския наша страсти исцели, \* и возстави от прегрешений лютых, \* Человеколюбче, и спаси нас.

**Слава, и ныне, Богородичен:**

**Храм** и Дверь еси, \* Палата и Престол Царев, \* Дево Всечистая, \* Еюже Избавитель мой, Христос Господь, \* во тьме спящим явися, \* Солнце Сый правды, \* просветити хотя, \* яже созда по образу Своему рукою Своею. \* Темже, Всепетая, \* яко Матерне дерзновение к Нему стяжавшая, \* непрестанно моли спастися душам нашим.

**Таже: Ныне отпущаеши: Трисвятое. По Отче наш:**

**Тропарь, глас 5.**

**Собезначальное** Слово Отцу и Духови, \* от Девы Рождшееся на спасение наше, \* воспоем, вернии, и поклонимся: \* яко благоволи плотию взыти на Крест, \* и смерть претерпети, \* и воскресити умершья \* славным Воскресением Своим.

**Богородичен:** **Радуйся,** Двере Господня непроходимая: \* радуйся, Стено и Покрове притекающих к Тебе. \* Радуйся, Необуреваемое Пристанище, \* и Неискусобрачная, \* Рождающая плотию Творца Твоего и Бога: \* молящи не оскудевай о воспевающих, \* и кланяющихся Рождеству Твоему.

## В СУББОТУ НА ПОВЕЧЕРИИ

Канон Пресвятей Богородице. Глас 5:

### Песнь 1

**Ирмос:** Коня и всадника в море Чермное, \* сокрушай брани \* мышцею высокою, \* Христос истряс: \* Израиля же спасе, \* победную песнь поюща.

**Припев:** Пресвятая Богородице спаси нас.

**Песнь** Ти по достоянию приносить, Владычице, недоумеем вси: слава бо паче всех Твоя. Но обаче Богоневесто, не омерзи моление приносимое со страхом и любовию Тебе.

**Вси** к воде Твоего неоскуднаго источника, Богородице Дево, притекаем зовуще: едина Радосте роду нашему, Пречистая, испроси мир церквам Твоим.

**Слава:** Положи Тя пристанище сущым в бедах, Чистая, Бог, Иже от Тебе благоволивый воспряти плоть. Темже Ти припадающе взываем: даруй Твоим рабом Твою помощь.

**И ныне:** Облегчение Твоя молитва, Дево Пречистая, Твоим рабом да будет, страстей отгнание, грехов разрушение, и всяческих болезней, Богородительнице, очищение.

### Песнь 3

**Ирмос:** Водрузивый на ничесомже землю повелением Твоим, \* и повесивый неодолимо тяготеющую, \* на недвижимем Христе, \* камени заповедей Твоих, \* Церковь Твою утверди, \* Едине Блаже и Человеколюбче.

**Ты** еси земнородных упование, и помощь и радость, покров и прибежище, Владычице Мати Живота. Темже Тя молим: Твою помощь низпосли всем поющим Тя, Пречистая.

**Недугующии**, и напастями лютыми одержимии, Вседетелю Щедрый, Иже всяческих Боже, Пречистую сень Твою Матерь Спасе, на мольбу Ти приводим: разреши пленицы прегрешений наших.

**Слава:** Всех Содержителя и Зиждителя и Господа рождающая Едина, и девствующи, иже воистинну Тя Божию Матерь славят, спасение Богоневесто, подаждь свыше рабом Твоим.

**И ныне:** Вод животворных мя исполни Владычице, Божественную воду мiрови источившая: и беззаконий моих лютыя потоки и сердца моего волны Божественною Твоею тишиною укроти.

### Песнь 4

**Ирмос:** Божественное Твое разумев истощание, \* прозорливо Аввакум, \* Христе, со трепетом вопияше Тебе: \* во спасение людей Твоих \* спасти помазанныя Твоя пришел еси.

**Яко** всех вышшу сущую тварей, Тя Бог сущым на земли дарова, Еже к Нему ходатайствы виновну, Богородице Препетая.

**Церковь** Тя Божию ведуще Дево Мати, прилежно молимся Тебе чтущии: не затвори рабом Твоим Богородице, Твоя милости дверей.

**Слава:** Тя вси Божию ведуще преукрашену воистинну одежду, Мати Браконейская: иже Тя чтущии просим, во оставления одежду облещы нас.

**И ныне:** Мир в Рождестве Твоем Пречистая, весь исполнися радости: отнележе, еже радуйся, великий Тебе Дево Мати Марие, свыше Гавриил возгласи.

### Песнь 5

**Ирмос:** Одейся светом яко ризою, \* к Тебе утренюю, и Тебе зову: \* душу мою просвети омраченную Христе, \* яко Един Благоутробен.

**Воистинну** наказуемся, не по равенству же долга согрешений наших: но, о Дево Мати Пречистая, отврати весь гнев Сына Твоего от нас.

**Единаго** изведшаго свет от тьмы Чистая, Бога рождши неискусобратно, прилежно моли Его, низпослати Божественный Свет рабом Твоим.

**Слава:** От каждения молитвы Твоя Чистая, и Божественная Невесто от Ливана, Юже Соломон прорече, рабы Твоя Мати Зиждителя, благоухай.

**И ныне:** Ты Правду же и Избавление нам рождши, Христа без семени, свободно содеяла еси Богородице, от клятвы естество прадеднее.

### Песнь 6

**Ирмос:** Неистовствующеся бурю душетленною, \* Владыко Христе, \* страстей море укроти \* и от тли возведи мя, \* яко Благоутробен.

**Богородице** Владычице, рождающая Содетеля, Твоим рабом испроси оставление: и державны нас воздвигни, во еже пети Тя.

**Буди** нам помощь Твоим рабом, Владычице Чистая верно молящим Тя, яко Милостива: и державны нас воздвигни, во еже пети Тя.

**Слава:** По достоянию имущи, еже мощи Владычице Чистая, Твоим милостивным оком призри, и от тли нас Твоя рабы возведи.

**И ныне:** Непрестанно точащи щедрот струи Благая просящим, одожди и мне свет заповедей Твоего Сына, Пренепорочная.

**Таже,** Господи помилуй, **трижды.**

**Слава, и ныне, седален, глас 5:**

**Всесвятая** Дево, \* помилуй нас прибегающих верою к Тебе Милосердой, \* и просящих теплаго Твоего заступления: \* можеша бо всех спасти, \* яко Благая сущи Мати Бога Вышняго, \* Матерними Твоими молитвами \* присно объемши Дево Богорадованная.

### Песнь 7

**Ирмос:** Превозносимый отец Господь \* пламень угаси, \* отроки ороси согласно поющия: \* Боже благословен еси.

**Неизследная** Божия мудросте Христе, рабы Твоя ущедрити, Рождшия Тя ради, непрестанно поющия: Боже, благословен еси.

**Твою** благодать молим Господи, язву исцели Рождшия Тя ради со страхом поющих: Боже благословен еси.

**Слава:** Оком милостивным Твоим Богомати призри и избави рабы Твоя всякаго обстояния, верою поющия: Боже, благословен еси.

**И ныне:** Зло делающе, Владычице, от Тебе отпадохом: но обретохом Пречистая, абие помощь Твою, вегда звати: Боже, благословен еси.

### Песнь 8

**Ирмос:** Из Отца прежде век рожденного Сына и Бога, \* и в последняя лета воплощенного от Девы Матере, \* священницы пойте, \* людие превозносите во вся веки.

**Владычице** наша, благих Подательнице, рабом Твоим даруй страстей исцеление: яко да непрестанно поем Тя Дево, и превозносим во веки.

**Неизглаголанно** Чистая, Избавителя рождши, несказанно доила еси Дева пребывши. Егоже убо моли о поющих Тя, и славословящих во вся веки.

**Слава:** Тебе Светлому Избавителя Свещнику, прекрасный сплетше лик поем: вся дела Господня пойте непрестанно Деву Марию, и превозносите Ю во веки.

**И ныне:** Чистая Агнице, Дево Мати Отроковице, чиста мя сотвори от страстей телесных: яко да льстиваго избавлюся сетей, песнослова Тя Богорадованная.

### Песнь 9

**Ирмос:** Исаие ликуй, Дева \* име во чреве, \* и роди Сына Еммануила, \* Бога же и Человека, \* Восток Имя Ему: \* Егоже величающе, \* Деву ублажаем.

**Совершается** пение убо, надежда же Владыко Христе непреходна, яже к Тебе Содетелю, якоже и благодать Твоя: но отобоюду силу крепку давай рабом Твоим, молитвами Рождшия Тя.

**Недугующим** сила, и болящим близ Ты Чистая еси, яко истинная Мати Жизни: темже к Тебе прибегающе, пременение всех скорбных обретохом, Владычице, и кровом Твоим спасохомся.

**Слава:** Твой Божественный видяще образно Владычице зрак, зрим Тя в нем якоже яве, всяко ненавидяще еретик безумие на земли. Емуже припадающе исцеление приемлем.

**И ныне:** Исцелением бездну, и благодатем пучину, Чистая познахом Тя мы грешнии. Темже Ти молимся: от нуждных всех изми Едина Пречистая, притекающих к покрову Твоему.

**Таже, Достойно есть: Трисвятое. По Отче наш: Кондак. И прочее обычно: и отпуст.**

## НА ПОЛУНОЩНИЦЕ,

Канон Святей и Живоначальной Троице, [егоже краестрочие: Правило пятое Свету Трисолнечному.] Творение Митрофаново, глас 5:

### Песнь 1

**Ирмос:** Коня и всадника в море Чермное, \* сокрушай брани \* мышцею высокою \* Христос истрясе: \* Израиля же спасе, \* победную песнь поюща.

**Припев:** Пресвятая Троице Боже наш, слава Тебе.

**Державу** Единственного и Трисолнечнаго зрака воспевающе вопием: ум наш озари Боже Всесильне, и к Твоей Владыко, возвыси славе неизреченной.

**Горе** Тя ангельская удобрения умная немолчно поют Трисвятыми песньми, Единицу Тричисленную, и Троицу Сообразну, Пресущественну, Всесильну.

**Слава:** Божественное питие Твоя любви, сладчайшее, светодейственное, души моей подаждь, Троице Единице Светоначальная, и Божественное умиление чистительное, Владыко Многомилостиве, всея твари.

**И ныне, Богородичен:** Якоже на руно сниде без шума с небесе Дево, дождь в ложесна Твоя Божественный: и спасе все изсохшее человеческое естество Пречистая.

### Песнь 3

**Ирмос:** Водрузивый на ничесомже землю повелением Твоим, \* и повесивый неодолимо тяготеющую,\* на недвижимем Христе, камени заповедей Твоих, \* Церковь Твою утверди, \* Едине Блаже и Человеколюбче.

**Умыслив** умная существа, составил еси певцы непрестанныя Твоего Божества, Трисветлый Боже и Вседетелю: но и бранных и земнородных приими моление и мольбу, яко Благоутробен.

**Иже** всякаго по естеству прещения неприятен, изменяемым нам и поющим, неизследимый источник Твоя благодати, согрешений даждь прощение, и спасение, яко Благоутробен.

**Слава:** Отца и Сына, и Духа славим, в непреходимом зраце Божества Тебе Единственному и Трисиянному Господу всех, якоже пророцы, и апостоли от Тебе яже научишася.

**Богородичен:** Явился еси Моисею в купине, яко ангел совета Великаго Вседержителя, Твое еже от Девы проявляя воплощение, Божий Слово: имже нас претворил еси, и на небеса возвел еси.

Господи помилуй, [трижды]

Седален, глас 5.

**Подобен:** Собезначальное Слово:

**Милостива** еси Троице Нераздельная: \* милуеши бо всех, яко Всесильная и Всещедрa, \* \*Сострадательна и Многомилостива. \* Темже прибегаем к Тебе, \* иже грехми многими отягчаеми зывающе: \* очисти Твоя рабы, и избави всех всякия муки.

**Слава, и ныне, Богородичен:**

**В**сесвятая Дево, \* помилуй нас прибегающих верою к Тебе Благоутробней, \* и просящих теплаго Твоего ныне заступления: \* можеши бо яко Благая всех спасти, \* яко сущи Мати Бога Вышняго, \* Матерния Твоя молитвы присно употребляющи, \* Богоблагодатная.

#### Песнь 4

**Ирмос:** Божественное Твое разумев истощание, \* прозорливо Аввакум, Христе, \* со трепетом вопияше Тебе: \* во спасение людей Твоих, \* спасти помазанныя Твоя пришел еси.

**Т**айно научается Единого Господства Трисветлому Даниил, Христа Судию узрев ко Отцу идуща, и Духа проявляюща видение.

**Б**ренными поющих Тя усты, Пресущественного Бога, Троична Ипостасьми, Единственна же Естеством, славы ангельския сподоби.

**Слава:** Едину власть, и Единое Господство, в Трех Свойствах неразлучно славим: Отче, и Сыне, и Душе, просвети ны рабы Твоя.

**Богородичен:** Гора частая и присенная, Юже видел прежде Аввакум, из Неяже пройде Святыи: неудобь зримое Рождество являше Твоего Дево, зачатия.

#### Песнь 5

**Ирмос:** Одейся светом яко ризою, \* к Тебе утренюю, и Тебе зову: \* душу мою просвети омраченную Христе, \* яко Един Благоутробен.

**И**же за благодать создавый человека, и по образу Твоему сотвори, во мне обитай Трисветне Боже мой, яко Благ и Благоутробен.

**Т**ы мя настави Единице Трисолнечная, к стезям Божественным спасения, и Твоего сияния исполни, яко естеством Бог Неисчисносилен.

**Слава:** Свет Нераздельный Единого Естества, разделенный начертаньми, Трисиянный, Невечерний, мое сердце лучами Твоими озари.

**Богородичен:** Яко виде Тя древле Чистая Пренепорочная, пророк, зрящая врата к Свету Незаходимому, абие Тя позна Божие Жилище.

#### Песнь 6

**Ирмос:** Неистовствующея бурю душетленною, \* Владыко Христе, \* страстей море укроти, \* и от тли возведи мя, яко Благоутробен.

**Т**рисветлое сущие Богоначалие Ипостасне, Единственна еси, яко сообразна и Равнодетельна, и по существу и хотению.

**Д**овольно изъяви пророк, поя Отцу Твоему Свету: узрим Духом, Свет Сына, Единого Бога Трисолнечного.

**Слава:** Несоставно Существо в Трех Свойствах, Едину власть и Державу имый: Тем бо состоится тварь всяческая, и обновляется.

**Богородичен:** Прегрешений избавление и бед, Владыко Боже, Единственне и Трисветне, низпосли Твоим певцем, молитвами Богоматере.

**Господи помилуй, [трижды].**

Седален, глас 5.

**Подобен:** Собезначальное Слово:

**Т**рисолнечный Свет славословим, \* и Простей Троице ныне поклонимся, \* яко просвети нас и помилува, \* и избави от тли весь род человеческий, \* избавляющи от прелести идольския весь мир, \* и Царство нам подаде.

**Слава, и ныне, Богородичен:**

**Н**едоумевся от всех, к Тебе прибегах к Надежди всех, \* и Прибежищу грешных и смиренных, зовый: \* согреших, и пребываю в злых, \* нечувствуя окаянный. \* Помилуй мя, прежде конца обрати мя, \* и избави всякия муки, недостойнаго.

**Песнь 7**

**Ирмос: Превозносимый отцев Господь, \* пламень угаси, \* отроки ороси согласно поющыя: \* Боже благословен еси.**

**Я**ко имый бездну милости, Господи, и пучину неизчетну щедрот, помилуй Единого Тя поющих, Трисветлаго Бога всех.

**Н**еобмыслимаго, Единственна и Трисветла, Бога Тя и Господа поюще вопием Ти: подаждь Твоим рабом очищение грехов.

**Слава: Р**авно Ипостаси во Единой Державе чтуще разделяем Неразделимо Существо, Бога Отца, и Сына, и Пресвятаго Духа.

**Богородичен: О**трасль прозябла еси, Отцу Собезначальную, цвет Божества: Отрасль Соприсноусущную, Дево, дающую жизнь всем человеком.

**Песнь 8**

**Ирмос: Тебе Вседетелю, в пещи отроцы, \* всемирный лик сплетше, пояху: \* дела всякая Господа пойте, \* и превозносите во вся веки.**

**Д**а Единого откриеши древле яве Господства Троичную Ипостась, явился еси Боже мой, во образе человекоев Аврааму, поющу Твою Державу Единственную.

**Т**ы мя к Твоим благодетельным лучам взирати сподоби Свете Неприступный, Отче Щедрый, и Слове, и Душе, еже благоугождати Тебе присно, Господи всех.

**Слава: С**вят Отец Бог Превечный: Свят же Сын из Отца рожден: Свят же и Животворящий Дух, исходя из Отца, Сыном же являемь.

**Богородичен: О**блистала еси нам от Трисолнечныя славы, Единого Всепетая Христа Господа, всех тайнонаукающа Единому Богоначалию в Трех Лицах, пети во веки.

**Песнь 9**

**Ирмос: Исаие ликуй, Дева \* име во чреве, \* и роди Сына Еммануила, \* Бога же и Человека, \* Восток Имя Ему: \* Егоже величающе, Деву ублажаем.**

**Г**лаголания человеческая по достоянию, Безначальная Единице, не могут пети Тя: обаче якоже мощно дерзающе от веры, Богоначальная, Сопрестольная Троице, славу приносим Твоей Державе, и хвалу.

**Р**авностатною славою, Тя Единоначалаго Трисветлаго Бога славят херувими и серафими пречистыми усты: с нимиже и нас грешных приими Господи, Твою Державу величающих.

**Слава: И**саиа Тя виде на Престоле херувимсте, и серафимы стоящыя окрест Тебе, крылы лица закрывающыя, и вопиющыя: Свят, Свят, Свят, Трисвятый Боже, славимый в Трех Свойствах.

**Богородичен:** Яко Чистая и Непорочная и Дева, родила еси Сына, избавляющаго нас от искушений, Бога Неизменна: но и ныне оставление нам прегрешений дати Сего моли.

**Посем припевы Григория Синаита:** Достойно есть: И прочее полунощницы, писано в конце книги сея.

## НА УТРЕНИ:

Бог Господь, и явился нам: на глас 5: и глаголем тропарь воскресный:

Тропарь, глас 5.

Собезначальное Слово Отцу и Духови, \* от Девы Рождшееся на спасение наше, \* воспоем, вернии, и поклонимся: \* яко благоволи плотию взыти на Крест, \* и смерть претерпети, \* и воскресити умершья \* славным Воскресением Своим. [Дважды].

Слава, и ныне, Богородичен:

Радуйся, Двере Господня непроходимая: \* радуйся, Стено и Покрове притекающих к Тебе. \* Радуйся, Необуреваемое Пристанище, \* и Неискусобрачная, \* Рождающая плотию Творца Твоего и Бога: \* молящи не оскудевай о воспевающих, \* и кланяющихся Рождеству Твоему.

Таже, обычная стихология Псалтира.

По 1-м стихословии седальны воскресны, глас 5:

Крест Господень похвалим, \* погребение Святое песньми почтим, \* и Воскресение Его препрославим: \* яко совозстави мертвыя от гроб яко Бог, \* пленив смерти державу, \* и крепость диаволу, \* и сущым во аде свет возсия.

Стих: Воскресни Господи Боже мой, да вознесется рука Твоя, не забуди убогих Твоих до конца.

Господи мертв нареклся еси, \* умертвивый смерть, \* во гробе положился еси, \* истощивый гробы: \* горе воини гроба стрежаху, \* доле от века мертвыя воскресил еси. \* Всесильне и Непостижимо Господи, слава Тебе.

Слава, и ныне, Богородичен:

Радуйся Святая Гора \* и Богопроходная, \* радуйся одушевленная купино и неопалимая. \* Радуйся Едина к Богу мiрови Мосте, \* преводяй мертвыя к Вечному Животу. \* Радуйся Нетленная Отроковице, \* неискусомужно рождающая спасение душ наших.

По 2-м стихословии седальны воскресны, глас 5:

Господи, по тридневнем Твоем Воскресении, \* и апостолов поклонении, Петр вопияше Ти: \* жены дерзновение прияша, \* аз же убояхся. \* Разбойник богословяше, аз же отвергохся. \* Убо призовеши ли мя прочее ученика быти? \* или паки покажеши мя ловца глубиннаго? \* но кающася прими мя Боже, и спаси мя.

Стих: Исповемся Тебе Господи, всем сердцем моим, повем вся чудеса Твоя.

Господи, посреде осужденных пригвоздиша Тя беззаконнии, \* и копием ребро Твое прободоша, \* О Милостиве! \* Погребение же приял еси, \* разрушивый адова врата, и воскресл еси тридневно. \* Притекоша жены видети Тя, \* и возвестиша апостолом востание: \* Превозносимый Спасе, Егоже поют ангели, \* Благословенный Господи, слава Тебе.

Слава, и ныне, Богородичен:

Неискусобрачная Невесто Богородительнице, \* Яже Евину печаль радостотворившая, \* воспеваем вернии и покланяемся Тебе, \* яко возвела еси нас от древния клятвы: \* и ныне моли непрестанно, \* Всепетая, Пресвятая, во еже спастися нам.

Ипакои, глас 5:

Ангельским зраком ум смущающа, \* и Божественным востанием душею просвещаемы, \* мвроносицы апостолом благовествоваху: \* возвестите во языцех Воскресение, \* Господу содействующу чудесы, \* подающему нам велию милость.

Степенна, глас 5. Антифон 1.

Ихже стихи повторяюще поем:

Внегда скорбети мне, \* давидски пою Тебе Спасе мой: \* избави душу мою \* от языка льстиваго.

Пустынным живот \* блажен есть, \* Божественным рачением \* воскриляющымся.

Слава: Святым Духом одержатся вся, \* видимая же с невидимыми: \* Самодержавен бо сый, Троицы Един есть неложно.

И ныне, тойже.

Антифон 2:

На горы душе, \* воздвигнемся, \* гряди тамо, \* отнюдуже помощь идет.

Десная Твоя рука, \* и мене Христе касающися, \* от лести всякия \* да сохранит.

Слава: Святому Духу богословяще рцем: \* Ты еси Бог, Живот, Рачение, Свет, Ум: \* Ты Благостыня, \* Ты царствуеши во веки.

И ныне, тойже.

Антифон 3:

О рекших мне: \* во дворы внидем Господня: \* радости многия исполнен быв, \* молитвы возсылаю.

В дому Давидове \* страшная совершаются: огонь \* бо тамо паля \* всяк срамный ум.

Слава: Святому Духу живоначалное достоинство, \* от Негоже всякое животно одушевляется, \* яко во Отце, купно же и Слове.

И ныне, тойже.

Прокимен, глас 5:

Прокимен: Воскресни Господи Боже мой, да вознесется рука Твоя, яко Ты царствуеши во веки.

Стих: Исповемся Тебе Господи, всем сердцем моим.

Всякое дыхание:

Евангелие утреннее рядовое.

Таже: Воскресение Христово видевши, \* поклонимся Святому Господу Иисусу, \* Единому Безгрешному: \* Кресту Твоему покланяемся Христе, \* и святое Воскресение Твое поем и славим: \* Ты бо еси Бог наш, \* разве Тебе иного не знаем, \* Имя Твое именуем. \* Приидите вси вернии, \* поклонимся святому Христову Воскресению: \* се бо прииде Крестом радость всему миру. \* Всегда благословяще Господа, \* поем Воскресение Его: \* распятие бо претерпев, \* смертию смерть разруши.

Псалом 50: Помилуй мя Боже:

**Слава:** Молитвами апостолов, \* Милостиве, \* очисти множества согрешений наших.

**И ныне:** Молитвами Богородицы, \* Милостиве, \* очисти множества согрешений наших.

**Таже, глас 6:** Помилуй мя Боже, \* по велицей милости Твоей, \* и по множеству щедрот Твоих, \* очисти беззаконие мое:

**Посем стихира:**

**Воскрес** Иисус от гроба, \* якоже прорече, \* даде нам живот вечный, \* и велию милость.

**Таже:** Спаси Боже люди Твоя:

**И возглас:** Милостию и щедротами и человеколюбием:

**Каноны:** Воскресный на 4: Крестовоскресный на 3: Богородичен на 3: Минеи на 4. Аще же празднуется святой, на 6. Крестовоскресный на 2: и Богородицы на 2.

**Канон воскресен, глас 5:**

**Песнь 1**

**Ирмос:** Коня и всадника в море Чермное, \* сокрушай брани \* мышцею высокою, \* Христос истряс: \* Израиля же спасе, \* победную песнь поюща.

**Припев:** Слава Господи, святому Воскресению Твоему.

**Тебе** терноносный еврейский сонм, любве Благодетелю к Тебе не сохрани матерния, Христе венча, родоначальника разрешающа терновое запрещение.

**Припев:** Слава Господи, святому Воскресению Твоему.

**Воздвиг** еси мя падшаго в ров, преклонься Жизнодавче, Безгрешне: и моя злосмрадная тли Христе, претерпев неискушенно, Божественнаго Существа миром мя облагоухал еси.

**Припев:** Пресвятая Богородице спаси нас.

**Богородичен:** Разрешися клятва, печаль преста: Благословенная бо и Благодатная, верным радость возсия, благословение всем концем цветоносящи Христа.

**Другий канон крестовоскресен.**

**Песнь 1, глас тойже**

**Ирмос:** Спасителю Богу:

**Припев:** Слава Господи Кресту Твоему честному и Воскресению.

**Иже** волею на кресте пригвожденному плотию, и древняго от изречения древом падшаго свободждшему, Тому Единому воспойм: яко прославися.

**Припев:** Слава Господи Кресту Твоему честному и Воскресению.

**Иже** из гроба мертвецу воскреспу Христу, и падшаго совозставившу, и соседением Отческим украсившему, Тому Единому воспойм: яко прославися.

**Припев:** Пресвятая Богородице спаси нас.

**Богородичен:** Пречистая Мати Божия, из Тебе воплощемуся, и от недр Родителя не разлучившемуся Богу, непрестанно молися, от всякаго обстояния спасти, ихже созда.

**Ин канон Пресвятей Богородице [егоже краестрочие: Свет рождающая, просвети мя**

Дево.]

Песнь 1, глас тойже

**Ирмос:** Коня и всадника в море Чермное:

Припев: Пресвятая Богородице спаси нас.

Света всельшагося в Тя Пречистая, и просвещшаго мир лучами Божества, Христа моли, просветити вся поющыя Тя, Мати Дево.

Припев: Пресвятая Богородице спаси нас.

Яко украшаема добротою добродетелей Благодатная, добротворное благолешие лучею Духа, подъяла еси Всечистая, всяческая удобрившаго.

Припев: Пресвятая Богородице спаси нас.

Тебе древле прообразующи купина в Синаи, не опалися Дево, огню присовокупльшися: Дева бо родила еси, и Дева пребыла еси, паче смысла Мати Дево.

**Катавасия:** Отверзу уста моя:

Песнь 3

**Ирмос:** Водрузивый на ничесомже землю повелением Твоим, \* и повесивый неодолимо тяготеющую, на недвижимем, Христе, \* камени заповедей Твоих, \* Церковь Твою утверди, \* Едине Блаже и Человеколюбче.

Припев: Слава Господи, святому Воскресению Твоему.

Желчь убо иже из камени мед ссавшии, в пустыни чудодействовавшему Тебе принесоша Христе: оцет же за манну воз благодаяние Ти воздаша отроцы Израилевы неблагодарнии.

Припев: Слава Господи, святому Воскресению Твоему.

Иже древле световидным облаком покрываеми, Живот во гробе Христа положиша: но самовластно воскрес, всем верным подаде тайно осеняющее свыше Духа сияние.

Припев: Пресвятая Богородице спаси нас.

**Богородичен:** Ты Мати Божия несочетанно родила еси, Иже от Нетленна Отца возсиявшаго, кроме болезней матерних: темже Тя Богородицу, воплощенна бо родила еси Слова, православно проповедуем.

Ин, Кресту :

**Ирмос:** Силою Креста Твоего Христе:

Припев: Слава Господи Кресту Твоему честному и Воскресению.

Воскресл еси от гроба Христе, тли смертныя избавль воспевающих Жизнодавче, вольное Твое распятие.

Припев: Слава Господи Кресту Твоему честному и Воскресению.

Помазати мвром тело Твое мвроносицы Христе тпяхуся, и не обретши возвратишася, воспевающыя Твое Востание.

Припев: Пресвятая Богородице спаси нас.

**Богородичен:** Моли непрестанно Чистая, воплощеннаго из боку Твоею, избавити от лести диаволи, воспевающыя Тя Деву Чистую.

Ин, Богородице :

**Ирмос: Водрузивый на ничесомже:**

**Припев: Пресвятая Богородице спаси нас.**

Лествица, Еюже к нам сниде Вышний, истлевшее естество исправить, Ты явственнo Чистая, всем ныне видена была еси: Тобою бо Преблагий мiрови беседовати благоволи.

**Припев: Пресвятая Богородице спаси нас.**

Еже древле предуставленное Дево таинство, и прежде век провидимое вся ведущему Богу, летом ныне напоследок в ложеснах Твоих Всенепорочная, конец прием явися.

**Припев: Пресвятая Богородице спаси нас.**

Разрешися клятвы древния осуждение Твоим ходатайством Дево Пречистая: из Тебе бо Господь явлься, всем благословение яко Преблагий источи, Едина человекoв удобрение.

#### Песнь 4

**Ирмос: Божественное Твое разумев истощание, \* прозорливо Аввакум, Христе, \* со трепетом вопияше Тебе: \* во спасение людей Твоих \* спасти помазанныя Твоя пришел еси.**

**Припев: Слава Господи, святому Воскресению Твоему.**

Яже от Мерры горчайшыя воды, яко во образе проначертая Пречистый Крест Твой Блаже, греховное умерщвляющ вкушение, древом усладил еси.

**Припев: Слава Господи, святому Воскресению Твоему.**

Крест за древо разумное, за сладкую же пищу желчь, Спасе мой, приял еси, за тление же смерти кровь Твою Божественную излиал еси.

**Припев: Пресвятая Богородице спаси нас.**

**Богородичен:** Кроме убо сочетания зачала еси нетленно во чреве, и без болезни родила еси, и по Рождестве Дева, Бога плотино рождши, сохранилася еси.

**Ин, Кресту :**

**Ирмос: Услышах слух силы Креста:**

**Припев: Слава Господи Кресту Твоему честному и Воскресению.**

Яко водрузися на земли на лобнем Крест, сокрушишася верей и вратницы вечнии, и возопиша: слава силе Твоей Господи.

**Припев: Слава Господи Кресту Твоему честному и Воскресению.**

Яко сниде Спас к связанным яко мертв, совоскресоша с Ним иже от века умершии, и возопиша: слава силе Твоей Господи.

**Припев: Пресвятая Богородице спаси нас.**

**Богородичен:** Дева роди, и матерских не позна: но Мати убо есть, Дева же пребысть: Юже воспевающе, радуйся Богородице, взываем.

**Ин, Богородице :**

**Ирмос: Божественное Твое:**

**Припев: Пресвятая Богородице спаси нас.**

Сердцем и умом, душею же и усты исповедую всеблагочестно Тя Богородицу воистинну, Чистая, спасения плод объемля, и спасаюся Дево, молитвами Твоими.

**Припев:** Пресвятая Богородице спаси нас.

Создавый от не сущих всяческая, от Тебе Чистая создатися яко Благодетель благоволи, на спасение верою и любовию Тя поющих, Всенепорочная.

**Припев:** Пресвятая Богородице спаси нас.

Поют Твое Рождество Всенепорочная премірнии лица, спасению радуящися, Истинную Богородицу мудрствующих Тя, Дево Нескверная.

**Припев:** Пресвятая Богородице спаси нас.

Тя Жезл Исаия именована, от Негоже прозябе нам красный Цвет, Христос Бог, на спасение верою и любовию притекающих к Покрову Твоему.

### Песнь 5

**Ирмос:** Одейся светом яко ризою, \* к Тебе утреннюю, и Тебе зову: \* душу мою просвети омраченную Христе, \* яко Един Благоутробен.

**Припев:** Слава Господи, святому Воскресению Твоему.

Иже славы Господь в неславне зраце, на древе обезчещен волею висит, о божественней мне славе несказанно промышляя.

**Припев:** Слава Господи, святому Воскресению Твоему.

Ты мя преоблекл еси в нетление, Христе, тли смертныя неистленно плотию вкуш, и возсияв из гроба тридневен.

**Припев:** Пресвятая Богородице спаси нас.

**Богородичен:** Ты правду же и избавление нам рождши Христа без семени, свободно содеяла еси от клятвы Богородице, естество праотца.

### Ин, Кресту :

**Ирмос:** Утреннююще вопием Ти:

**Припев:** Слава Господи Кресту Твоему честному и Воскресению.

Простерл еси длани Спасе наш на древе, вся призывая к Себе, яко Человеколюбец.

**Припев:** Слава Господи Кресту Твоему честному и Воскресению.

Пленил еси ад Спасе мой Твоим погребением, и Твоим Воскресением радости вся исполнил еси.

**Припев:** Слава Господи Кресту Твоему честному и Воскресению.

Воскрес от гроба тридневно Жизнодавче, и всем источил еси безсмертие негиблющее.

**Припев:** Пресвятая Богородице спаси нас.

**Богородичен:** Деву по Рождестве воспеваем Тя Богородице: Ты бо Бога Слова плотию мiрови родила еси.

### Ин, Богородице :

**Ирмос:** Одейся светом:

**Припев:** Пресвятая Богородице спаси нас.

Вси пророцы Тя яве предвозвестиша хотящую быти Божию Матерь, Богородице Чистая: едина бо обрелася еси Чистая, совершенна Непорочная.

**Припев:** Пресвятая Богородице спаси нас.

Светел облак Тя животныя воды, нам тучу нетления Христа одождивший отчаянным, Чистая, познаваем.

**Припев:** Пресвятая Богородице спаси нас.

Яко близ всю Тя добру и непорочну, запечатленну девством чисте возлюби, в Тя Вселившийся Бог, яко един Благоутробен.

### Песнь 6

**Ирмос:** Неистовствующеся бурю душетленною, \* Владыко Христе, \* страстей море укроти, \* и от тли возведи мя яко Благоутробен.

**Припев:** Слава Господи, святому Воскресению Твоему.

В тление поползся родоначальник, Владыко Христе, преслушанного брашна вкуш, и к животу возведен бысть страстию Твоею.

**Припев:** Слава Господи, святому Воскресению Твоему.

Живот низшел еси ко аду, Владыко Христе, и тление растлевшему быв, тлением источил еси Воскресение.

**Припев:** Пресвятая Богородице спаси нас.

**Богородичен:** Дева роди, и рождши пребысть чиста, на руку носящаго всяческая, яко воистинну Дева Мати понесшая.

### Ин, Кресту :

**Ирмос:** Обыде мы бездна:

**Припев:** Слава Господи Кресту Твоему честному и Воскресению.

Простерл еси длани Твои, собирая далече расточенная язык Твоих собрания, Христе Боже наш, живоносным Крестом Твоим, яко Человеколюбец.

**Припев:** Слава Господи Кресту Твоему честному и Воскресению.

Пленил еси смерть, и врата ада сокрушил еси, Адам же связанный разрешен быв, вопияше Тебе: спасе мя десница Твоя Господи.

**Припев:** Пресвятая Богородице спаси нас.

**Богородичен:** Купину Тя неопалиму, и гору и лестницу одушевлену, и врата небесная достойно славим, Марие славная, православных похвало.

### Ин, Богородице :

**Ирмос:** Неистовствующеся бурю:

**Припев:** Пресвятая Богородице спаси нас.

Иже всему виновный, и еже быти всем подавый, яко виновну имяше воплощаемь, еже по нам, Тя Богомати Всенепорочная.

**Припев:** Пресвятая Богородице спаси нас.

Испелений Владычице, душепитательный точащий источник верно притекающим к покрову Твоему благославному, вемы Тя Всенепорочная.

**Припев:** Пресвятая Богородице спаси нас.

Спасению виновна Жизнодавица родила еси нам, вечное избавление дарующаго, Истинную Богородицу Тя проповедающим.

### Кондак, глас 5.

**Подобен:** Собезначальное Слово:

**К**о аду Спасе мой \* сошел еси, \* и врата сокрушивый \* яко Всесилен, \* умерших яко Создатель совоскресил еси, \* и смерти жало сокрушил еси, \* и Адам от клятвы избавлен бысть, Человеколюбче. \* Темже вси зовем: \* спаси нас Господи.

**Икос:** Услышавши жены ангеловы глаголы, отложиша рыдание, радостны бывши и трепетны, ужас бо видеша, и се Христос приближися к ним, глаголя: еже, радуйтеся, дерзайте, аз мира победих, и узники свободих, потщитесь убо ко учеником, возвещающа им: яко варяю вы во граде Галилейстем, еже проповедати. Темже вси Тебе зовем: спаси нас Господи.

### Песнь 7

**Ирмос:** Превозносимый отцев Господь \* пламень угаси, \* отроки ороси, согласно поющыя: \* Боже, благословен еси.

**Припев:** Слава Господи, святому Воскресению Твоему.

**П**лотию обложься якоже на удице льщения, Божественною Твоею силою змия низвлека еси возводя вопиющыя: Боже, благословен еси.

**Припев:** Слава Господи, святому Воскресению Твоему.

**З**емли непроходное осуществовавый составление, во гробе покрывается плотию Невместимый. Емуже вси поем: Боже, благословен еси.

**Припев:** Пресвятая Богородице спаси нас.

**Богородичен:** Едину убо Ипостась во Двою Естеству, Всенепорочная родила еси Воплощеннаго Бога. Емуже вси поем: Боже, благословен еси.

### Ин, Кресту :

**Ирмос:** В пещи огненной песнословцы:

**Припев:** Слава Господи Кресту Твоему честному и Воскресению.

**И**же древом крестным идольскую прелесть разрешивый, благословен Бог отец наших.

**Припев:** Слава Господи Кресту Твоему честному и Воскресению.

**В**оскресый из мертвых, и сущыя во аде совоздвигнувый, благословен Бог отец наших.

**Припев:** Слава Господи Кресту Твоему честному и Воскресению.

**Т**воею смертию Христе, смертную разорь державу, благословен Бог отец наших.

**Припев:** Пресвятая Богородице спаси нас.

**Богородичен:** Иже от Девы рождься, и Богородицу Сию показавый, благословен Бог отец наших.

### Ин, Богородице :

**Ирмос:** Превозносимый отцев:

**Припев:** Пресвятая Богородице спаси нас.

**Н**еопределенный пребыв Непреложен, плоти по Ипостаси соединися, яко Благоутробен, в Тебе Пресвятей: Иже Един благословен Бог отец наших.

**Припев:** Пресвятая Богородице спаси нас.

**Невесту** Тя Всенепорочную Богородице Владычице, согласно славим и Престол Зиждителя Твоего. Емуже вси поем: Боже, благословен еси.

**Припев:** Пресвятая Богородице спаси нас.

**Мати** всех Царя, очищшиися духом Дево, была еси, Тебе Создавшаго. Емуже вси поем: Боже, благословен еси.

**Припев:** Пресвятая Богородице спаси нас.

**Спасе** мя Господь, Богомати Пречистая, одеждею плоти из Тебе одеявся. Емуже вси поем: Боже, благословен еси.

### Песнь 8

**Ирмос:** Тебе Вседетелю, в пещи отроцы, \* всемірный лик сплетше пояху: \* дела всякая Господа пойте, \* и превозносите во вся веки.

**Припев:** Слава Господи, святому Воскресению Твоему.

**Ты** о вольней спасительныя страсти помолился еси чаши, якоже невольней: два хотения, двема бо по коемуждо носиши существа Христа, во веки.

**Припев:** Слава Господи, святому Воскресению Твоему.

**Твоим** вседетельным схождением, ад Христе, поруганный избева вся, яже древле лестию умерщвленныя, Тебе превозносящия во вся веки.

**Припев:** Пресвятая Богородице спаси нас.

**Богородичен:** Тя яже паче ума богомужне Словом Рождающую Господа, и девствующую, вся дела Дево благословим, и превозносим во вся веки.

### Ин, Кресту :

**Ирмос:** Из Отца прежде век:

**Припев:** Слава Господи Кресту Твоему честному и Воскресению.

**Иже** на Кресте волею длани простершаго, и узы смертныя разрушившаго Христа Бога, священницы пойте, людие превозносите во вся веки.

**Припев:** Слава Господи Кресту Твоему честному и Воскресению.

**Иже** яко Жениха из гроба возсиявшаго Христа Бога, и муносоицам явльшагося, и радость тем провещавша, священницы пойте, людие превозносите во вся веки.

**Припев:** Пресвятая Богородице спаси нас.

**Богородичен:** Херувим превышши явилася еси Богородице Чистая, во чреве Твоем, Иже на тех носимаго понеси: Егоже со безплотными человецы славословим во вся веки.

### Ин, Богородице :

**Ирмос:** Тебе Вседетелю в пещи:

**Припев:** Пресвятая Богородице спаси нас.

**Преста** ныне яже праотчая печаль, радость приемши Ти Богоматерни. Темже непрестанно поем Тя Дево, и превозносим во вся веки.

**Припев:** Пресвятая Богородице спаси нас.

**Поет** с нами безплотных собор, Дево Рождество Твое непостижимое, един лик составльше любовию, и превозносяще его во веки.

**Припев:** Пресвятая Богородице спаси нас.

**Струя** прозрачная безсмертия Отроковице из Тебе изыде, Иже всех Господь, скверну омывая верою Тя поющих, и превозносящих во вся веки.

**Припев:** Пресвятая Богородице спаси нас.

**Божественный** воистинну, и светоносный Престол, и скрижали благодати исповедуем Тя, Слово Дево Отчее яко приемшую: Егоже превозносим во вся веки.

**Таже, поем песнь Богородицы:** Величит душа моя Господа:

**С припевом:** Честнейшую херувим:

**Песнь 9**

**Ирмос:** Исаие ликуй, Дева \* име во чреве,\* и роди Сына Еммануила, \* Бога же и Человека, \* Восток Имя Ему: \* Егоже величающе, \* Деву ублажаем.

**Припев:** Слава Господи, святому Воскресению Твоему.

**Падшаго** человека восприял еси Владыко Христе, из ложесн Девических всему совокуплься, греху же ни единому причащся: всего от исления Ты свободил еси пречистыми Твоими страстьми.

**Припев:** Слава Господи, святому Воскресению Твоему.

**Боготочною** кровию истощенною Владыко Христе, от Твоих пречистых ребр и животворящих, жертва убо преста идольская, вся же земля Тебе хваления жертву приносит.

**Припев:** Пресвятая Богородице спаси нас.

**Богородичен:** Не Бога безплотна, ниже паки человека проста произведе Чистая Отроковица, и Нескверная: но Человека совершенна, и неложно совершенна Бога. Егоже величаем со Отцем же и Духом.

**Ин, Кресту :**

**Ирмос:** Тя паче ума:

**Припев:** Слава Господи Кресту Твоему честному и Воскресению.

**Тебе** Иже на Кресте страсть подъемшаго, и адову силу смертию сокрушившаго, вернии православно величаем.

**Припев:** Слава Господи Кресту Твоему честному и Воскресению.

**Тебе** из гроба тридневно воскресша, и ад пленившаго, и мир просветившаго, вернии единомудренно величаем.

**Припев:** Пресвятая Богородице спаси нас.

**Богородичен:** Радуйся Богородице, Мати Христа Бога, Егоже родила еси, моли прегрешений оставление даровати, верою поющим Тя.

**Ин, Богородице :**

**Ирмос:** Исаие ликуй:

**Припев:** Пресвятая Богородице спаси нас.

**От** чистых кровей Твоих усырися плоть преестественно всех Содетелю, Единородному Сыну Родителю, не от мужа, без семени же умна и одушевлена, Богородице Приснодево.

**Припев:** Пресвятая Богородице спаси нас.

**Об**ходимое устави еси смерти неудержимое стремление, рождаши плотию воистинну паче ума Жизнь вечную: Ейже приложься усты горькими ад упразднися, Пресвятая Мати Дево.

**Припев:** Пресвятая Богородице спаси нас.

**На** престоле седя Сын Твой Владычне, рясны Тя златыми Божественных добродетелей свет сияюще, одесную постави Себе Чистая, дая честь яко Матери Тебе, Всенепорочная.

**Припев:** Пресвятая Богородице спаси нас.

**Паче** ума Рождество Твое Богомати: без мужа бо зачатие в Тебе, и девически рождение бысть: ибо Бог есть Рождейся, Егоже величающе, Тя Дево ублажаем.

**По** катавасии ектении малая.

**Таже, Свят** Господь Бог наш. **Екзапостиларий утренний.**

**На хвалитех стихиры воскресны, глас 5:**

**Стих:** Сотворити в них суд написан, слава сия будет всем преподобным Его.

**Господи,** запечатану гробу от беззаконников, \* прошел еси из гроба, \* якоже родился еси от Богородицы: \* не уразумеша, како воплотился еси, \* безплотнии Твои ангели: \* не чувствоваша, когда воскресл еси, \* стрегущии Тя воины. \* Обоя бо запечатлестася испытующим, \* явишася же чудеса кланяющимся верою таинству: \* еже воспевающим, \* воздаждь нам радость и велию милость.

**Стих:** Хвалите Бога во святых Его, хвалите Его в утверждении силы Его.

**Господи,** верей вечныя сокрушив, \* и узы растерзав, \* от гроба воскресл еси, \* оставль Твоя погребальная, \* во свидетельство истиннаго тридневнаго Твоего погребения: \* и предварил еси в Галилеи, \* в пещере стрегомый. \* Велия Твоя милость, \* Непостижимо Спасе, помилуй и спаси нас.

**Стих:** Хвалите Его на силах Его, хвалите Его по множеству величества Его.

**Господи,** жены текоша на гроб, \* видети Тя Христа нас ради пострадавшаго, \* и пришедшия, обретоша ангела \* на камени сидяща, \* страхом отвальшемся, \* и к ним возопи глаголя: \* воскресе Господь, рцйте учеником, \* яко воскресе от мертвых, \* спасаяй души наша.

**Стих:** Хвалите Его во гласе трубнем: хвалите Его во псалтири и гуслех.

**Господи,** якоже изшел еси \* от запечатаннаго гроба, \* тако вшел еси и дверем заключеным \* ко учеником Твоим, \* показуя им телесная страдания, \* яже подъял еси Спасе Долготерпеливый: \* яко от семени Давидова \* язвы претерпел еси: \* яко Сын же Божий, \* мир свободил еси. \* Велия Твоя милость, \* Непостижимо Спасе, помилуй и спаси нас.

**Ины стихиры Анатолиевы.**

**Стих:** Хвалите Его в тимпане и лице, хвалите Его во струнах и органе.

Господи Царю веков, и Творче всех, \* нас ради распятие и погребение плотию приемый, \* да нас от ада свободиши всех: \* Ты еси Бог наш, \* разве Тебе иного не вемы.

**Стих:** Хвалите Его в кимвалех доброгласных, хвалите Его в кимвалех восклицания: всякое дыхание да хвалит Господа.

Господи, пресияющая Твоя чудеса кто исповестъ? \* или кто возвестит страшная Твоя таинства? \* вочеловечивыйся бо нас ради, \* яко Сам восхотел еси, \* державу явил еси силы Твоея: \* Крестом бо Твоим разбойнику рай отверзл еси, \* и погребением Твоим верей адовы сокрушил еси, \* Воскресением же Твоим всяческая обогатил еси: \* Благоутробне, Господи, слава Тебе.

**Стих:** Воскресни Господи Боже мой, да вознесется рука Твоя, не забуди убогих Твоих до конца.

Мурноносицы жены гроба Твоего достигши, \* зело рано искаху Тебе мурны помазати, \* Безсмертнаго Слова и Бога: \* и ангела глаголы огласившися, \* возвращахуся радостию, \* апостолом возвестити яве, \* яко воскресл еси, Животе всех, \* и подал еси миру очищение и велию милость.

**Стих:** Исповемся Тебе Господи всем сердцем моим, повем вся чудеса Твоя.

Богоприятнаго гроба ко иудеом стражие глаголаху: \* О вашего суемудреннаго совета! \* стрещи Неописаннаго покусившися, \* всеу трудистесь, \* сокрыти Воскресение распятаго хотяще, \* ясно покажете. \* О вашего суемудреннаго соборища! \* что паки сокрыти советуете, \* Еже некрывается? \* паче же от нас услышите, \* и веровати восхощите бывших истине: \* ангел молниеносец с небесе сошед камень отвали, \* егоже страхом мертвостию содержими быхом, \* и возгласив крепкоумным мурноносицам, \* глаголаше женам: \* не зрите ли стражей умерщвления, \* и печатей разрешения, \* адова же истощания? \* почто победу адову Упразднившаго, \* и смертное жало Сокрушившаго, \* яко мертва взыскуете? \* блавестите же скоро шедши апостолом Воскресение, \* без страха зовущя: \* воистинну воскресе Господь, имея велию милость.

**Слава, стихира утренняя евангельская.**

**И ныне, Богородичен: Преблагословенна еси:**

**Славословие великое.**

**Таже, тропарь воскресен:**

**Д**несь спасение миру бысть, \* поем Воскресшему из гроба, \* и Начальнику жизни нашея: \* разрушив бо смертию смерть, \* победу даде нам, \* и велию милость.

**Таже, ектении. И отпуст.**

## НА ЛИТУРГИИ:

### Изобразительная, блаженна, глас 5:

**Разбойник** на кресте Бога Тя быти веровав, Христе, исповеда Тя чисте от сердца, помяни мя Господи, вопия, во Царствии Твоем.

**Стих:** Блажени чистии сердцем, яко тии Бога узрят.

**Иже** на древе крестнем жизнь процветшаго роду нашему, и изсушивша юже от древа клятву, яко Спаса и Содетеля согласно воспоим.

**Стих:** Блажени миротворцы, яко тии сынове Божии нарекутся.

**Смертию** Твоею Христе, смертную разрушил еси силу, и совоздвигл еси иже от века умершья, Тя поющья истиннаго Бога и Спаса нашего.

**Стих:** Блажени изгнани правды ради, яко тех есть Царство Небесное.

**На гроб** Твой Христе, пришедши жены честныя, искаху Тя Жизнодавче муропомазати, и явился им ангел вопия: воскресе Господь.

**Стих:** Блажени есте, егда поносят вам, и ижденут, и рекут всяк зол глагол на вы лжуще Мене ради.

**Распеншу** Тя ся Христе, посреде двою осужденною разбойнику, един убо хуля Тя, осужден бысть праведне: другой же исповеда Тя, в рай вселися.

**Стих:** Радуйтесь и веселитесь, яко мзда ваша многа на небесех.

**Ко** апостолов лику пришедши жены честныя, возопиша: Христос воскресе, яко Владыце и Содетелю Тому поклонимся.

**Таже, Троице** Нераздельная, Единице Вседетельная и Всесильная, Отче, Сыне и Святый Душе, Тебе поем Истиннаго Бога и Спаса нашего.

**Таже, Радуйся** одушевленный Храме Божий и Врата Непроходимая: радуйся неопалимый и огнеобразный Престоле: радуйся Мати Еммануила, Христа Бога нашего.

### Тропарь воскресный, глас 5.

**Собезначальное** Слово Отцу и Духови, \* от Девы Рождашееся на спасение наше, \* воспоим, вернии, и поклонимся: \* яко благоволи плотию взыти на Крест, \* и смерть претерпети, \* и воскресити умершья \* славным Воскресением Своим. [Дважды].

### Кондак воскресный, глас 5.

**Ко** аду Спасе мой \* сошел еси, \* и врата сокрушивый \* яко Всесилен, \* умерших яко Создатель совоскресил еси, \* и смерти жало сокрушил еси, \* и Адам от клятвы избавлен бысть, Человеколюбче. \* Темже вси зовем: \* спаси нас Господи.

### Прокимен, глас 5:

**Прокимен :** Ты Господи сохраниши ны, \* и соблюдеши ны от рода сего и во век.

**Стих:** Спаси мя Господи, яко оскуде преподобный.

**Аллилуия:** Милости Твоя Господи во век воспою, в род и род возведу истину Твою усты моими.

**Стих:** Зане рекл еси: в век милость созиждется, на небесех уготовится истина Твоя.